

CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A ASOCIACIÓN GALLEGA DE CENTROS DE MENORES (AGACEME) PARA O DESENVOLVEMENTO DO PROGRAMA DE REFORZO E APOIO EDUCATIVO INTEGRAL DOS NENOS, NENAS E ADOLESCENTES DOS CENTROS DE PROTECCIÓN Á INFANCIA E Á ADOLESCENCIA

Lugar e data da sinatura dixital

REUNIDOS

Dunha banda, dona (...), conselleira de Política Social e Igualdade, actuando en nome e representación da Consellería de Política Social e Igualdade, no uso das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, o Decreto 44/2024, do 14 de abril, do seu nomeamento, o Decreto 42/2024, do 14 de abril, polo que se establece a estrutura orgánica da Xunta de Galicia, o Decreto 49/2024 do 22 de abril, polo que se establece a estrutura orgánica das consellerías da Xunta de Galicia e o Decreto 139/2024, do 20 de maio, polo que se establece a estrutura orgánica da Consellería de Política Social e Igualdade, a resolución de 8 de abril de 1991 pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, publicado no Diario Oficial de Galicia por Resolución de 1 de abril de 1991.

E doutra, don (...), con DNI (...), en calidade de presidente da Asociación galega de centros de menores, con NIF (...), actuando en nome e representación dela, segundo o acordo do seu nomeamento adoptado na reunión da Xunta Directiva de data 12 de xaneiro de 2021, en base á Asemblea Xeral da dita asociación do día 11 de decembro de 2020.

Interveñen en función dos seus respectivos cargos e no exercicio das facultades que no nome das entidades que representan teñen conferidas

EXPOÑEN

Primeiro. Que as Administracións Públicas poden celebrar convenios de colaboración con outras administracións ou entes de dereito público e con persoas físicas ou xurídicas ao abeiro do disposto no capítulo VI do título preliminar da Lei 40/2015, do 1 de outubro, do réxime xurídico do sector público.

Segundo. Que a Constitución española dispón no artigo 39, entre os principios reitores da política económica e social, o apoio dos poderes públicos para asegurar a protección social, económica e xurídica da familia, sinalando igualmente que os/as menores deberán gozar da protección prevista nos acordos internacionais, entre os que deben incluírse os dereitos recoñecidos á infancia pola Convención sobre os Dereitos do Neno, aprobada pola Asemblea Xeral das Nacións Unidas o 20 de novembro de 1989 e en vigor en España dende o 5 de xaneiro de 1991.

Terceiro. A Comunidade Autónoma de Galicia ostenta competencias exclusivas en materia de asistencia social, de conformidade co disposto no artigo 27.23 do Estatuto de autonomía de Galicia, Lei Orgánica 1/1981, do 6 de abril, e nos Reais Decretos de Transferencia 2411/1982, do 24 de xullo e 534/1984, do 25 de xaneiro e, en virtude da dita competencia aprobouse a Lei 13/2008, do 3 de decembro de servizos sociais de Galicia e a Lei 3/2011, do 30 de xuño, de apoio á familia e á convivencia de Galicia.

Cuarto. Que a Consellería de Política Social e Igualdade é o órgano superior da administración autonómica, ao que lle corresponde as competencias en materia de servizos sociais, conforme ao Decreto 139/2024, do 20 de maio, polo que se establece a estrutura orgánica da Consellería de Política Social e Igualdade, e ten entre as súas funcións e competencias as relativas á protección e a tutela das persoas menores en situación de risco ou desamparo nos termos establecidos no Código Civil, na Lei Orgánica 1/1996, do 15 de xaneiro, de protección xurídica do/da menor, de modificación parcial do Código Civil e da Lei de Axuízamento Civil e no ámbito da Comunidade Autónoma de Galicia a Lei 3/2011, do 30 de xuño, de apoio á familia e á convivencia de Galicia, o Decreto 42/2000 do 4 de xaneiro, polo que se refunde a normativa reguladora vixente en materia de familia, infancia e adolescencia, modificado polo Decreto 406/2003, do 29 de outubro, na Lei Orgánica 8/2015, de 22 de xullo de modificación do sistema de protección á infancia e adolescencia e a Lei 26/2015, de 28 de xullo de modificación do sistema de protección á infancia e á adolescencia e na Lei Orgánica 8/2021 do 4 de xuño, de protección integral á infancia fronte á violencia.

Quinto. Que a entidade Asociación galega de centros de Menores (AGACEME), con número de rexistro 82000167, no depósito de Estatutos de Organizacións Sindicales y Empresariales, del Ministerio de Trabajo Y Economía Social, con data 03/04/1998, e que así mesmo figura inscrita no Rexistro Único de Entidades Prestadoras de Servizos Sociais (RUEPSS) con data de inscrición 24/05/2021 e co código E7281, é unha asociación patronal, ao amparo da Lei 19/1977, de 1 de abril, reguladora do dereito de asociación sindical, con personalidade xurídica propia e sen fin de lucro, que desenvolve as actividades no ámbito territorial da Comunidade autónoma de Galicia, sendo o seu ámbito profesional a atención á infancia, xuventude, adolescencia e as súas familias.

Sexto. Son fins básicos da Asociación galega de centros de Menores (AGACEME):

- Ostentar a representación, xestión, promoción dos intereses económicos, sociais e profesionais; defensa da lexítima independencia administrativa e identidade pedagóxica de todas e cada unha das Institucións de Menores como alternativa válida dentro dos programas que poidan existir para lograr o benestar da infancia.
- Promover a primacía do supremo interese do menor sobre calquera outro interese, tal como vén reflectido nas Declaracións internacionais dos Dereitos Humanos, Dereitos do Niño, Lexislación do Estado e da Comunidade Autónoma; mediante o exercicio responsable do dereito para crear, dirixir e xestionar centros de menores e/o programas de iniciativa social.
- Representación e defensa dos intereses das Entidades que compoñen AGACEME, dos seus centros de menores e dos seus equipos educativos.
- Ofrecer transitoriamente un soporte convivencial digno, para unha atención especializada aos menores en situación de risco e desprotección, orientado á súa integración social e familiar.
- Propiciar e canalizar a participación dos membros na xestión solidaria dos problemas e responsabilidades que lles son comúns en orde á súa ser, promoción e desenvolvemento dos mesmos.

Sétimo. Que na actualidade resulta preciso desenvolver un programa de reforzo e apoio educativo integral dos nenos, nenas e adolescentes do ámbito de protección, para mellorar, apoiar e reforzar a súa educación integral. Este programa concíbese para atender e apoiar as posibles necesidades especiais que poidan sufrir as persoas menores que están en centros de acollemento residencial do ámbito de protección de menores. Polo que irá dirixido a axudar aos nenos, nenas e adolescentes para que poidan desenvolver con éxito as súas capacidades tanto académicas, como persoais e emocionais e lograr a plena integración no ámbito educativo, persoal e social.

De acordo con iso, a Consellería de Política Social e Igualdade considera que a colaboración a través da concesión dunha subvención pública directa permite o fomento das actuacións descritas na cláusula segunda que cumpren, indubidablemente, unha función de interese social en consonancia co establecido no artigo 19.4 c) da Lei 9/2007, do 13 de xuño, de subvencións de Galicia e no artigo 40 do seu regulamento, aprobado polo Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia.

Oitavo. Que o carácter singular deste convenio vén determinado por razóns de interese público, social e humanitario. Xa que o obxecto do convenio consiste en promover a mellora da convivencia dos nenos, nenas e adolescentes que se atopan en centros de acollemento residencial concretos. Ademais, AGACEME é a única asociación existente en Galicia de centrso de menores, polo que o programa obxecto deste convenio non pode ser desenvolvido por ningunha outra entidade. Consonte o anterior estímase xustificada a imposibilidade de promover a concorrencia de ofertas.

Noveno. Que a concesión directa da subvención a través deste convenio efectuarase ao abeiro dos artigos 19.4.c) e 26 da Lei 9/2007, do 13 de xuño, e o artigo 40 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, nos que se prevé a posibilidade de excepcionar do réxime ordinario de concorrencia competitiva en base ao carácter singular das subvencións e razóns de interese público, social e humanitario, cal é o caso, no que o interese prioritario é a protección e promoción na Comunidade Autónoma de Galicia dos dereitos da infancia.

En virtude do exposto, ambas as dúas partes outorgan e subscriben de mutuo acordo o presente convenio de colaboración con suxeición ás seguintes,

CLÁUSULAS

PRIMEIRA. Obxecto

O obxecto deste convenio é contribuír ao financiamento durante 2024 por parte da Consellería de Política Social e Igualdade, a través da concesión directa dunha subvención pública, para o desenvolvemento do programa de reforzo e apoio educativo integral dos nenos, nenas e adolescentes nos centros que prestan atención residencial a persoas menores con medidas de protección á infancia e á adolescencia, e que están integrados na Asociación de centros de Menores de Galicia (AGACEME).

A finalidade é contribuír a mellorar, apoiar e reforzar a educación integral dos nenos, nenas e adolescentes que se atopan en acollemento residencial. Este programa concíbese co propósito de atender e apoiar as posibles necesidades especiais que poidan sufrir estas persoas menores que están no ámbito de protección de menores. Polo que irá dirixido a axudar aos nenos, nenas e adolescentes para que poidan desenvolver con éxito as súas capacidades tanto académicas, como persoais e emocionais e lograr a plena integración no ámbito educativo, persoal e social.

SEGUNDA. Actuacións subvencionables

Serán obxecto da subvención as actuacións que a continuación se relacionan:

Actuacións a subvencionar no eido do convenio:

- Actuacións de reforzo e apoio educativo integral dos nenos, nenas e adolescentes, para mellorar a formación integral que reciben os nenos, nenas e adolescentes, potenciando as súas capacidades e talentos tanto desde a súa perspectiva escolar e académica como formativa e persoal. Nesta liña de actuacións incluíranse entre outras actividades de capacitación do persoal en mellores prácticas de reforzo escolar e a incorporación de novas actividades que permitan o reforzo da educación integral humana, académica, emocional e social.
- Actuacións encamiñadas á profesionalización e formación continua do persoal de

atención directa aos nenos, nenas e adolescentes. Consisten na promoción da formación continua e o intercambio de coñecementos entre os e as profesionais e voluntariado involucrado e a mellora da profesionalización, incluíndo entre outras actividades de planificación, organización, execución e asistencia a cursos, seminarios, xornadas ou obradoiros de formación para o persoal e voluntariado que interactúan cos nenos, nenas e adolescentes. Así mesmo, tamén fomentárase o intercambio de experiencias e boas prácticas entre as persoas profesionais e as entidades.

TERCEIRA. Orzamento

A previsión do orzamento de gastos para a subvención obxecto deste convenio ascende a 295.399,47 €, que serán achegados pola Consellería de Política Social e Igualdade. O dito importe será imputado á aplicación orzamentaria 38.02.312B.481.0, código de proxecto 2016 00174, dos orzamentos xerais da Comunidade Autónoma de Galicia para o ano 2024.

CUARTA. Obrigas da entidade

1. A Asociación de Centros de Menores de Galicia (AGACEME), terá que cumprir os requisitos do artigo 10 da Lei 9/2007, do 13 de xuño, de subvencións de Galicia, e do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia. Sen prexuízo de todo o anterior, tamén deberá cumprir as obrigas seguintes:

a) Acreditar a realización dos gastos subvencionables, así como o cumprimento dos requisitos ou das condicións que determinaron a concesión da axuda. O cumprimento desta obriga de xustificación realizarase nos termos previstos no artigo 28 da Lei 9/2007, do 13 de xuño, e no artigo 30 da Lei 38/2003, do 17 de novembro, xeral de subvencións, na normativa regulamentaria de desenvolvemento e no disposto no presente convenio.

b) Someterse ás actuacións de comprobación que deba efectuar o órgano concedente, así como calquera outra comprobación e control financeiro que poidan realizar os órganos de control competentes, tanto nacionais coma comunitarios e achegar tanta información lle sexa requirida no exercicio das actuacións anteriores.

- c) Comunicarlle á entidade concedente a obtención de subvencións, axudas, ingresos ou recursos que financien as actividades subvencionadas. Esta comunicación deberá efectuarse tan pronto como se coñeza e, en todo caso, con anterioridade á xustificación da aplicación dada aos fondos percibidos.
- d) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable á entidade beneficiaria en cada caso, así como cantos estados contables e rexistros específicos sexan esixidos polo convenio, coa finalidade de garantir o adecuado exercicio das facultades de comprobación e control.
- e) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.
- f) Proceder ao reintegro dos fondos percibidos nos supostos previstos nos artigos 32 e 33 da Lei 9/2007, do 13 de xuño.
- g) Incluír na publicidade e en todo tipo de documentación e información relacionada coas actividades obxecto das actuacións a subvencionar a través do convenio e nos lugares onde estas se realicen "subvencionado pola Xunta de Galicia-Consellería de Política Social e Igualdade" co seu respectivo logotipo.
- h) Cumprir cantas outras obrigas se deriven da execución deste convenio.

2. Así mesmo, a entidade deberá cumprir a obriga de subministración de información nos termos establecidos no artigo 4 da Lei 1/2016, do 18 de xaneiro, de transparencia e bo goberno.

QUINTA. Documentación previa

En virtude do disposto na Lei 38/2003, do 17 de novembro e no Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións; na Lei 9/2007, do 13 de xuño, e no Decreto 11/2009, do 8 de xaneiro, a entidade beneficiaria presentará, con carácter previo á sinatura do convenio e xunto coa relación de actividades a desenvolver, a seguinte documentación:

- a) Declaración comprensiva de todas as axudas e subvencións solicitadas ou concedidas para as mesmas actividades, ou, se fora o caso, unha declaración de que non solicitaron nin percibiron outras axudas ou subvencións.
- b) Declaración responsable, subscrita polo representante da entidade, de non estar incurso nas prohibicións para obter a condición de beneficiaria de subvencións sinaladas nos apartados 2 e 3 do artigo 10 da Lei 9/2007, do 13 de xuño.

SEXTA. Compatibilidade con outras axudas

A subvención prevista neste convenio é compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais.

O importe da subvención en ningún caso poderá ser de tal contía que, illadamente ou en concorrencia con subvencións ou axudas doutras administracións públicas ou doutros entes públicos ou privados, nacionais ou internacionais, supere o custo total dos gastos subvencionables ás entidades.

SÉTIMA. Forma de pagamento

1. Respecto ao pagamento e forma de xustificación da subvención estarase ao disposto na Lei 38/2003, do 17 de novembro, e no Real decreto 887/2006, do 21 de xullo, na Lei 9/2007, do 13 de xuño, e no Decreto 11/2009, do 8 de xaneiro.

2. O pagamento farase nunha conta corrente da que sexa titular a entidade beneficiaria nas seguintes condicións:

Realizarase o pagamento da totalidade da subvención unha vez asinado o presente convenio, efectuados todos os gastos subvencionables e achegando a documentación indicada na cláusula oitava.

3. Con carácter previo ao pagamento poderá consultarse, salvo oposición por parte da entidade beneficiaria, o cumprimento das súas obrigas tributarias, coa Seguridade Social e coa facenda da Administración Pública da Comunidade Autónoma de Galicia, así como non ser debedora por resolución dun procedemento de reintegro. De opoñerse terá que facelo

de xeito expreso tal e como sinala o artigo 28 da Lei 39/2015, do 1 de outubro, e achegar os xustificantes ou documentación necesaria para acreditar o seu cumprimento, se fora o caso, de conformidade co disposto na normativa de subvencións.

OITAVA. Gastos subvencionables e xustificación

1. Son gastos subvencionables os que cumpran os requisitos fixados polo artigo 29 da Lei 9/2007, do 13 de xuño. Para estes efectos, considerarase gasto realizado o que foi efectivamente pagado con anterioridade á finalización do período de xustificación que remata o 31 de decembro de 2024.

En consideración ao obxecto do convenio ten carácter subvencionable o gasto de persoal e o gasto corrente directamente relacionado coa actividade subvencionada, e derivado das contratacións de servizos precisas para a debida execución do programa no marco do disposto no presente convenio.

Así mesmo, considerarase efectivamente pagado o gasto cando se xustifique o pagamento mediante extractos ou certificacións bancarias debidamente identificados, selados e asinados pola persoa con capacidade da entidade beneficiara. Este pagamento debe referirse a gasto de accións realizadas obxecto da concesión da subvención. No suposto de que o xustificante do pagamento inclúa varias facturas, deberase xuntar unha relación delas.

No suposto de facturas pagadas conxuntamente con outras non referidas ás actuacións subvencionadas, a xustificación do pagamento débese realizar sempre mediante a achega do correspondente extracto bancario que irá acompañado dun dos seguintes documentos: relación emitida polo banco dos pagamentos realizados especificando o pago das actuacións a subvencionar; orde de pagamentos da entidade selada polo banco ou recibo da persoa provedora.

2. A presentación da conta xustificativa levarase a cabo unha vez rematadas todas as actuacións obxecto da concesión da subvención a través do convenio e en todo caso con data límite 31 de decembro do 2024, achegando a seguinte documentación, conforme ao previsto nos artigos 48 e 50 do Decreto 11/2009, do 8 de xaneiro:

a) Unha memoria final das actuacións desenvolvidas a subvencionar a través deste convenio, con indicación das actividades realizadas, datas de inicio e finalización das mesmas, resultados obtidos e valoración cualitativa, número de persoas beneficiarias en cada actividade, achegando información sobre os nenos, nenas e adolescentes atendidos no programa de reforzo e apoio educativo integral e da formación do persoal que presta o servizo de acollemento residencia , ademais doutros aspectos que se consideren relevantes.

b) Unha memoria económica abreviada xustificativa do custo das actividades realizadas, que conterá:

1º. Unha ficha resumo dos gastos de persoal e do resto dos gastos.

2º. Unha relación clasificada e debidamente agrupada dos gastos, con identificación da persoa acreedora e do documento, o seu importe, data de emisión e data de pagamento. No caso dos gastos realizados con medios ou recursos propios, indicaranse os criterios de repartición dos custos xerais e/ou indirectos incorporados na relación, e se o importe do xustificante se imputa total ou parcialmente á subvención, indicarse neste último caso a porcentaxe ou contía que se imputa.

3º. Especificación das desviacións producidas sobre as cantidades inicialmente orzamentadas pola Asociación de Centros de Menores de Galicia (AGACEME).

4º. Unha relación detallada doutros ingresos ou subvencións que financiasen as actuacións a subvencionar a través deste convenio, con indicación do importe e a súa procedencia, xa sexa de entes públicos ou privados.

5º. No suposto de gastos de importe superior a 15.000,00€, os tres orzamentos que, en aplicación do artigo 29.3 da Lei 9/2007, do 13 de xuño, deba ter solicitado a Asociación de Centros de Menores de Galicia (AGACEME).

6º. Se fose o caso, a carta de pagamento de reintegro no suposto de remanentes non aplicados así como dos xuros derivados destes.

3. A revisión da parte da conta xustificativa integrada polas facturas ou documentos de valor probatorio equivalente no tráfico xurídico mercantil ou con eficacia administrativa incorporados na relación a que se fai referencia no número anterior e a documentación

acreditativa do pagamento será efectuada por unha persoa auditora de contas inscrita como exercinte no Rexistro Oficial de Auditores de Contas dependente do Instituto de Contabilidade e Auditoría de Contas, designado pola entidade beneficiaria.

A estes efectos, achegarase o informe da revisión efectuada pola persoa auditora de contas, que se estenderá á totalidade da conta xustificativa, e que como mínimo deberá deixar constancia dos seguintes extremos:

1º. Adecuación da natureza do gasto, en relación ás actuacións subvencionadas a través deste convenio previstas no anexo I, así como en relación aos conceptos de gastos considerados como subvencionables que se relacionan na cláusula segunda.

2º. Verificación da relación clasificada e debidamente agrupada dos gastos citada no número 2 letra b), conforme coincide coa documentación xustificativa destes e coa documentación acreditativa do seu pagamento, con indicación dos reparos correspondentes. Conforme ao previsto no artigo 49 do Decreto 11/2009, do 8 de xaneiro, deberase indicar na relación clasificada e debidamente agrupada dos gastos, que estes son "Subvencionados pola Consellería de Política Social e Igualdade" e se o importe do xustificante se imputa total ou parcialmente á subvención, indicando neste último caso a porcentaxe ou contía que se imputa.

3º. Indicación do importe, desagregado por partidas e global, correctamente xustificado, tanto en relación á xustificación do gasto como do seu pagamento, conforme ás previsións contidas nesta cláusula.

4º. Verificación das desviacións producidas sobre as cantidades inicialmente orzamentadas.

5º. Verificación do importe global percibido pola entidade como ingresos en concepto de subvencións, tanto de entes públicos como privados, e aplicado o financiamento das actuacións a subvencionar a través do convenio, e que este non supera o gasto total xustificado.

A Asociación de Centros de Menores de Galicia (AGACEME) estará obrigada a pór a disposición da persoa auditora de contas cantos libros, rexistros e documentos lle sexan esixibles en aplicación do disposto no artigo 11.f da Lei 9/2007, do 13 de xuño, así como a conservalos co obxecto das actuacións de comprobación e control previstas na lei. O

gasto derivado da revisión da conta xustificativa poderá ter a condición de gasto subvencionable.

4. A falta de presentación da xustificación no prazo establecido comportará o reintegro da subvención, ou da parte proporcional non xustificada, e demais responsabilidades establecidas na Lei 9/2007, do 13 de xuño. Exceptúase desta previsión a presentación da documentación xustificativa do pagamento das nóminas de decembro, documento de Relación Nominal de Traballadores (RNT) e documento de Relación de Liquidacións de Cotizacións (RLC) de novembro e decembro e IRPF correspondentes ao cuarto trimestre do ano 2024, que se presentará mediante addenda ao informe da auditoría na primeira quincena de febreiro de 2025.

Con carácter previo ao pagamento poderá consultarse, salvo oposición por parte da Asociación de Centros de Menores de Galicia (AGACEME), o cumprimento das súas obrigas tributarias, coa Seguridade Social e coa facenda da Administración Pública da Comunidade Autónoma de Galicia, así como non ser debedor por resolución de procedemento de reintegro. De opoñerse terá que facelo de xeito expreso tal e como sinala o artigo 28 da Lei 39/2015, do 1 de outubro, e achegar os xustificantes ou documentación necesaria para acreditar o seu cumprimento.

5. Toda a documentación xustificativa dos gastos a subvencionar a través deste convenio deberá ser asinada pola persoa representante de Asociación de Centros de Menores de Galicia (AGACEME).

NOVENA. Incumprimentos, reintegros e sancións

Producirase a perda do dereito ao cobro total ou parcial da axuda no suposto de falta de xustificación do cumprimento do convenio, dos deberes contidos nestas cláusulas, dos deberes contidos no artigo 33 da Lei 9/2007, do 13 de xuño ou na demais normativa aplicable, o que dará lugar á obriga de reintegrar total ou parcialmente a axuda percibida, así como os intereses de demora correspondentes.

O procedemento para declarar a orixe da perda do dereito de cobramento da axuda e para facer efectiva a devolución a que se refire o punto anterior será o establecido no Título II da Lei 9/2007, do 13 de xuño.

Sempre que se cumplan os requisitos ou condicións esenciais reflectidos no convenio, a Consellería de Política Social e Igualdade poderá apreciar un incumprimento parcial e deberá resolver sobre o seu alcance, aplicando a mesma ponderación que tivera a condición incumplida no convenio e, se é o caso, establecendo o deber de reintegro.

Cando se trate de condicións referentes á contía ou conceptos do obxecto subvencionable, o alcance do incumprimento determinarase proporcionalmente ao gasto deixado de practicar ou aplicado a conceptos distintos dos considerados subvencionables e, se fora o caso, deberán reintegrarse as cantidades percibidas en dita proporción. Con carácter xeral, se o incumprimento superara o 65% das actuacións a subvencionar a través do convenio, entenderase que dito incumprimento é total, debendo reintegrarse todas as cantidades percibidas e o seus intereses de demora.

DÉCIMA. Inexistencia de relación laboral

A Asociación de Centros de Menores de Galicia (AGACEME) queda facultada para designar o persoal necesario para realizar as actividades propostas.

A subscrición do presente convenio non leva consigo relación laboral nin contractual entre a Consellería de Política Social e Igualdade e as persoas que realicen as actividades obxecto del, de tal xeito que non se lle poderá esixir ningunha responsabilidade, nin directa nin subsidiaria, polos actos ou feitos acaecidos no desenvolvemento del.

DÉCIMO PRIMEIRA. Comisión de seguimento e control

Para o seguimento e coordinación das accións previstas no presente convenio crearase unha comisión mixta e paritaria na que estarán representadas as partes asinantes do convenio. Esta comisión, que se reunirá por petición de calquera das partes, será o mecanismo de actuación conxunta para o seguimento e avaliación das actuacións estipuladas no presente convenio, e estará formada por dúas persoas representantes da Consellería de Política Social e Igualdade e dúas persoas representantes da Asociación de Centros de Menores de Galicia (AGACEME), designadas por cada unha das persoas titulares que representan ás partes asinantes así como as persoas suplentes.

A dita comisión será presidida por un/unha dos/das representantes da administración, designado pola persoa titular da Dirección Xeral de Familia, Infancia e Dinamización Demográfica. A persoa que ocupe a secretaría, que actuará con voz pero sen voto, así como a súa suplente, será unha persoa adscrita á Dirección Xeral de Familia, Infancia e Dinamización Demográfica, designada pola persoa que asuma a Presidencia.

Como órgano colexiado a comisión someterase ao réxime establecido na Lei 40/2015, do 1 de outubro do réxime xurídico do sector público e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia. Así mesmo e de acordo coa Disposición adicional primeira da Lei 7/2023, do 30 de novembro, para a igualdade efectiva de mulleres e homes de Galicia, establecerase unha presenza ou composición equilibrada entre mulleres e homes na citada Comisión de seguimento.

DÉCIMO SEGUNDA. Vixencia

O presente convenio estenderá os seus efectos dende a súa formalización e terá vixencia ata o 31 de decembro de 2024.

Non obstante, poderanse incluír gastos dende o 1 de xaneiro de 2024, que tamén poderán ser subvencionadas ao seu abeiro, coa achega da Consellería de Política Social e Igualdade.

DÉCIMO TERCEIRA. Transparencia e bo goberno

O presente convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da lei 1/2016, do 18 de xaneiro, o artigo 15 da Lei 9/2007, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes consienten dar publicidade dos seus datos persoais e demais especificación recollidas no presente instrumento de colaboración o Portal de Transparencia e Goberno Aberto.

De conformidade coa Lei 38/2003, do 17 de novembro, o instrumento de colaboración e a información sobre a subvención serán comunicados á Base de Datos Nacional de Subvencións.

DÉCIMO CUARTA. Información básica sobre protección de datos persoais

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e a libre circulación de estes datos e polo que se derroga a Directiva 95/46/CE (Regulamento xeral de protección de datos).

Os datos persoais recadados neste procedemento serán tratados na súa condición de responsable pola Xunta de Galicia-Consellería de Política Social e Igualdade coa finalidade de levar a cabo a tramitación administrativa derivada da xestión da concesión directa a través deste convenio que comprende verificar os datos e documentos que a entidade interesada achegue para comprobar a exactitude destes, levar a cabo as actuacións administrativas que se deriven e informar sobre o estado de tramitación.

O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas no enlace <https://www.xunta.gal/información-xeral-proteccion-datos>, derivada dunha competencia legalmente atribuída ao responsable do tratamento, así como o cumprimento das obrigas legais impostas ao dito responsable de conformidade co disposto no artigo 6.1, letras c) e e) do Regulamento (UE) 2016/679 do Parlamento Europeo e do Consello, do 27 de abril de 2016 e o artigo 8 da Lei orgánica 3/2018, do 5 de decembro, e en concreto a competencia e obrigas previstas nos preceptos básicos da Lei 38/2003, do 17 de novembro, da Lei 9/2007, do 13 de xuño, na Lei 39/2015, do 1 de outubro, na Lei 1/2016, do 18 de xaneiro e na Lei 4/2019, do 17 de xullo, de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia de conformidade coa normativa de aplicación.

A referencia á publicidade, en cumprimento da normativa de transparencia e subvencións, axustarase a dita normativa e coas limitación que esta establece.

Como destinatarios, os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.

As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, no seu caso, o consentimento outorgado a través da sede electrónica da Xunta de Galicia, ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-de-dereitos>. O contacto coa persoa delegada de protección de datos e máis información consultarase no enlace <https://www.xunta.gal/proteccion-datos-persoais>.

DÉCIMO QUINTA. Réxime xurídico

O presente convenio terá carácter administrativo rexéndose nos seus efectos polo establecido nas súas cláusulas, na Lei 38/2003, do 17 de novembro; no Real decreto 887/2006, do 21 de xullo; na Lei 9/2007, do 13 de xuño; no Decreto 11/2009, do 8 de xaneiro e na Lei 40/2015, do 1 de outubro. No seu defecto, para resolver as lagoas e dúbidas que puideran presentarse, rexerase polo establecido na Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro do 2014.

As cuestións litixiosas xurridas acerca da interpretación, modificación e resolución serán resoltas pola Consellería de Política Social e Igualdade poñendo os seus acordos fin á vía administrativa.

Contra elas cabe recurso potestativo de reposición ante o mesmo órgano que ditou a resolución, segundo o previsto no artigo 124 da Lei 39/2015, do 1 de outubro, no prazo dun mes se a acto fose expreso, se non o fose, poderase interpor recurso de reposición en calquera momento a partir do día seguinte a aquel en que se produza o acto presunto.

Poderase interpoñer directamente recurso contencioso - administrativo, no prazo de dous meses contados desde o día seguinte á notificación do acto que poña fin á vía administrativa, se este fose expreso, se non o fose, o prazo será de seis meses e contarase, para o solicitante e outros posibles interesados, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso - administrativa.

Para tales efectos o tribunal competente será o Tribunal Superior de Xustiza de Galicia.

E en sinal de conformidade coas estipulacións do presente convenio, o asinan ambas as dúas persoas comparecentes no lugar e data da sinatura dixital.

CONSELLEIRA DE POLÍTICA SOCIAL E
IGUALDADE

O PRESIDENTE DA ASOCIACIÓN GALEGA DE
CENTROS DE MENORES- AGACEME

(...)

(...)

Anexo I

Distribución Orzamento por conceptos de gastos

TÁBOA DE CONCEPTOS	Orzamento en euros
A) GASTOS DE XESTIÓN E ADMINISTRACIÓN (coordinación, control, deseño de ferramentas e execución do programa) correspondentes ao programa a subvencionar	135.420,84 €
B) ACTIVIDADES CONFERENCIAS E OBRADOIROS	18.817,39 €
C) GASTOS DE PERSOAL (nóminas) do persoal que realiza a actividade formativa do programa	57.040,70 €
D) DIETAS E DESPRAZAMENTOS do persoal que realiza as actividades do programa	0,00 €
F) OUTROS GASTOS (material de oficina, didáctico, diversos) asociados á actividade do programa	84.120,54 €
Total Convenio	295.399,47 €

ANEXO II

ANEXO II.- Actuacións do Programa de reforzo e apoio educativo integral dos nenos, nenas e adolescentes no ámbito de protección

1. Reforzo e apoio educativo integral dos nenos, nenas e adolescentes

Descrición: Mellorar a formación integral que reciben os nenos, nenas e adolescentes, potenciando tanto a súa perspectiva escolar como formativo-persoal.

Obxectivos Específicos:

- ✓ Dispoñer de sistemas de xestión eficientes e certificados.
- ✓ Capacitar ao persoal en mellores prácticas de reforzo educativo e formación integral dos nenos, nenas e adolescentes.
- ✓ Mellorar os programas de apoio educativo existentes para potenciar a mellora dos resultados académicos dos nenos, nenas e adolescentes.
- ✓ Incorporar novas actividades que permitan o reforzo da educación integral humana que se traballa cos nenos, nenas e adolescentes.
- ✓ Incrementar o volume de recursos dispoñibles, tanto internos como externos, para o reforzo educativo ou a educación integral das persoas menores.
- ✓ Realizar auditorías ou avaliacións periódicas da calidade do servizo.

2. Profesionalización e Formación continua do persoal

Descrición: Promover a formación continua e o intercambio de coñecementos entre os e as profesionais e voluntariado involucrado, e aumento da profesionalización.

Obxectivos Específicos:

- a) Identificación e priorización das necesidades formativas aliñadas coa execución dos programas.
- b) Identificación e priorización das necesidades formativas aliñadas coas necesidades de coñecemento destinadas ao reforzo educativo dos nenos, nenas e adolescentes.
- c) Identificación e priorización das necesidades formativas aliñadas coas necesidades de coñecemento destinadas á educación integral dos dos nenos, nenas e adolescentes.



- d) Planificar e organizar cursos, seminarios, xornadas ou talleres de formación para o persoal e voluntariado que interactúan cos nenos, nenas e adolescentes..
- e) Facilitar a asistencia, o acceso a recursos educativos e de desenvolvemento profesional.
- f) Fomentar o intercambio de experiencias e boas prácticas entre as persoas profesionais e as entidades.